

### (15) Antara Ayat-Ayat Muhkamaat Dan Ayat-Ayat Mutasyabihaat.

Sebelum pergi lebih jauh, para pelajar Tafsir al-Qur'an perlu mengetahui perbezaan pandangan 'ulama' tentang apa yang dinamakan sebagai ayat-ayat muhkamaat dan ayat-ayat mutasyabihaat. Apa yang disepakati sebagai ayat-ayat mutasyabihaat dan apa pula yang tidak disepakati.

Di sana terdapat tiga pendapat 'ulama' Tafsir tentangnya:

(1) Ada 'ulama' mengatakan ayat-ayat al-Qur'an itu semuanya muhkamaat. Dalilnya di sisi mereka ialah firman Allah berikut:

الرَّكَّابُ أَحْكَمْتُ آيَاتُهُ ثُمَّ فَصَّلْتُ مِنْ لَدُنْ حَكِيمٍ خَيْرٍ ﴿١﴾

Bermaksud: Alif, Laam, Ra. Al-Qur'an sebuah Kitab yang tersusun ayat-ayatnya dengan tetap teguh, kemudian dijelaskan pula kandungannya satu persatu. (Susunan dan penjelasan itu) adalah dari sisi Allah Yang Maha Bijaksana, lagi Maha Mendalam pengetahuanNya. (Hud:1).

Bagi mereka sebabnya semua ayat al-Qur'an itu muhkamaat ialah kerana:

(a) Susunan bahasanya semuanya teguh dan kukuh. (b) Semua dalil dan buktinya kuat dan teguh. (c) Setiap ayatnya benar dan betul. (d) Setiap ayat al-Qur'an bersih daripada segala kekurangan dan terpelihara daripada kesilapan, sama ada pada perkataan atau ma'nanya. (e) Ia penuh dengan hikmat dan dan mashlahah. (f) Al-Qur'an adalah kalam Allah, Tuhan Yang Maha Bijaksana lagi Maha Mendalam IlmuNya, maka sudah tentulah ia penuh dengan kebijaksanaan dan ilmu yang tepat dan kemas. (g) Tidak ada di dalamnya perkara sia-sia dan senda gurau. Semuanya tegas dan bukan main-main (serius). (h) Ia terpelihara daripada segala bentuk kebatilan dan penyelewengan.

Apa yang dikemukakan sebagai sebab bagi muhkamnya (teguh dan kukuhnya) semua ayat-ayat al-Qur'an itu terkandung dalam ayat 1 Surah Hud yang dibentangkan di atas.

Pendapat (1) ini sebenarnya memakai perkataan muhkam atau muhkamaat dalam ma'na bahasa 'Arabnya semata-mata. Ia tiada kaitan dengan ma'na istilahinya yang terpakai dalam 'Uloom al-Qur'an. Memanglah menurut bahasa 'Arab muhkam bererti teguh,

kukuh, kuat, kemas, teratur dan tersusun dengan baik, benar, betul dan lain-lain seperti telah disebutkan di atas tadi.

(2) Ada yang mengatakan kesemua ayat-ayatnya mutasyabihaat. Dalilnya ialah firman Allah di bawah ini:

اللَّهُ نَزَّلَ أَحْسَنَ الْحَدِيثِ كِتَابًا مُتَشَابِهًا مَثَابًا تَقْشَعِرُّ مِنْهُ جُلُودُ الَّذِينَ يَخْشَوْنَ رَبَّهُمْ ثُمَّ تَلِينُ جُلُودُهُمْ وَقُلُوبُهُمْ إِلَى ذِكْرِ اللَّهِ ذَلِكَ هُدَى اللَّهِ يَهْدِي بِهِ مَنْ يَشَاءُ وَمَنْ يُضْلِلِ اللَّهُ فَمَا لَهُ مِنْ هَادٍ ﴿٣٥﴾

Bermaksud: Allah telah menurunkan sebaik-baik perkataan iaitu Kitab Suci al-Qur'an yang bersamaan isi kandungannya antara satu dengan yang lain (tentang benarnya dan indahnyanya), yang berulang-ulang (keterangannya, dengan berbagai cara); yang (oleh kerana mendengarnya atau membacanya) kulit badan orang-orang yang takut kepada Tuhan mereka menjadi seram; kemudian kulit badan mereka menjadi lembut serta tenang tenteram hati mereka menerima ajaran dan rahmat Allah. Kitab Suci itulah hidayat petunjuk Allah; Allah memberi hidayat petunjuk dengan al-Qur'an itu kepada sesiapa yang dikehendakiNya (menurut undang-undang peraturanNya) dan (ingatlah) sesiapa yang disesatkan Allah (disebabkan pilihannya yang salah), maka tidak ada sesiapa pun yang dapat memberi hidayat petunjuk kepadanya. (az-Zumar:23).

Mutasyabihaat dari segi bahasanya bererti saling menyerupai atau bersamaan antara satu dengan yang lain.

Sebabnya semua ayat al-Qur'an itu mutasyabihaat ialah kerana:

(a) Kefasihan dan kesenian bahasanya sama. (b) Kebenaran yang terdapat di dalam semua ayat-ayatnya adalah serupa dan sama. (c) Setiap ayat di dalamnya merupakan mu'jizat dan turun daripada Allah, ia bukan hasil karangan manusia, semuanya adalah sama antara satu dengan yang lain. (d) Saling membenarkan, menyokong dan mentafsirkan satu sama lain. (e) Kesamaan dan keserupaan yang sempurna membuatkan ayat-ayatnya tidak bercanggah dan bertentangan antara satu dengan yang lain.

Kedua-dua pendapat yang dikemukakan di atas, baik tentang muhkam atau mutasyabih tidak dipakai dalam ma'na istilahinya, malah ma'na-ma'na yang diberikan itu hanya menurut bahasa `Arab semata-mata.

(3) Ada pula yang mengatakan sebahagian ayat al-Qur'an muhkamaat, sebahagian yang lain pula mutasyabihaat. Inilah pendapat yang betul dalam bab ini. Dalil yang menjadi pengangan mereka ialah firman Allah berikut:

هُوَ الَّذِي أَنْزَلَ عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ مُتَشَابِهَاتٌ فَأَمَّا الَّذِينَ فِي قُلُوبِهِمْ زَيْغٌ فَيَتَّبِعُونَ مَا تَشَابَهَ مِنْهُ ابْتِغَاءَ الْفِتْنَةِ وَابْتِغَاءَ تَأْوِيلِهِ وَمَا يَعْلَمُ تَأْوِيلَهُ إِلَّا اللَّهُ وَالرَّسُخُونَ فِي الْعِلْمِ يَقُولُونَ ءَامَنَّا بِهِ كُلٌّ مِنْ عِنْدِ رَبِّنَا وَمَا يَذَّكَّرُ إِلَّا أُولُو الْأَلْبَابِ ﴿٧٠﴾

Bermaksud: Dialah yang menurunkan kepadamu (wahai Muhammad) Kitab Suci al-Qur'an. Sebahagian dari al-Qur'an itu ialah ayat-ayat "Muhkamaat" (yang tetap, tegas dan nyata maknanya serta jelas maksudnya); ayat-ayat Muhkamaat itu ialah ibu (atau pokok) al-Qur'an dan yang selainnya ialah ayat-ayat "Mutasyabihaat" (yang samar-samar, tidak terang maksudnya). Adapun orang-orang yang ada dalam hatinya kecenderungan ke arah kesesatan, maka mereka selalu menurut apa yang samar-samar dari al-Qur'an untuk menimbulkan fitnah dan untuk mencari-cari Ta'wilnya (memutarakan maksudnya menurut yang disukainya). Padahal tidak ada yang mengetahui Ta'wilnya (tafsir maksudnya yang sebenar) melainkan Allah. Dan orang-orang yang tetap teguh serta mendalam pengetahuannya dalam ilmu-ilmu agama, berkata: Kami beriman kepadanya, semuanya itu datangnya dari sisi Tuhan kami dan tiadalah yang mengambil pelajaran dan peringatan melainkan orang-orang yang berfikiran. (Aali 'Imraan:7).

### Erti Muhkam Dan Mutasyabih Menurut Istilah

Para 'ulama' juga berbeda pendapat dalam menta'rifkan (mendefinisikan) ma'na muhkam dan mutasyabih. Di bawah ini dikemukakan beberapa ta'rifnya (definisinya) sepertimana yang dikemukakan oleh para 'ulama' usul:

(i) Muhkam ialah sesuatu yang diketahui maksudnya, sama ada kerana kejelasannya atau kerana dapat dita'wil (ditafsirkan). Mutasyabih pula ialah sesuatu yang diketahui Allah sahaja, seperti bilakah akan berlaku hari kiamat, bilakah akan keluar Dajjal dan maksud sebenar huruf-huruf ringkas di permulaan beberapa Surah al-Qur'an. Menurut al-Qurthubi, inilah ta'rif mutasyabih yang terbaik. Al-Aalusi mengaitkannya dengan

pegangan Ahlu as-Sunnah Wa al-Jama'ah. Menurut beliau, inilah ta'rif yang terpilih. Al-Aamidi mengatakan ta'rif (i) dan (ii) selepas ini adalah yang paling sahih.

(ii) Muhkam ialah perkataan atau ayat yang terang ma'nanya. Mutasyabih ialah yang tidak terang ma'nanya.

(iii) Muhkam ialah sesuatu perkataan atau ayat yang terang dan jelas ma'nanya sehingga tidak mungkin dihapuskan dan tidak difahami. Mutasyabih pula ialah sesuatu perkataan atau ayat yang begitu tersembunyi dan rumit ma'nanya sehingga tidak dapat ditentukan, baik dengan 'aql mahupun dengan naqal. Allah sahaja yang mengetahui tentangnya, seperti tentang bilakah akan berlaku hari kiamat, bilakah akan keluar Dajjal dan maksud sebenar huruf-huruf ringkas di permulaan beberapa Surah al-Qur'an. Al-Aalusi mengatakan ini ialah pendapat tokoh-tokoh 'ulama' Hanafiyyah.

(iv) Muhkam ialah sesuatu perkataan atau ayat yang tidak dapat menerima kecuali satu ma'na atau tafsiran sahaja. Adapun mutasyabih, maka ia adalah sesuatu perkataan atau ayat yang dapat menerima beberapa ma'na dan tafsiran. Pendapat ini dikaitkan dengan Ibnu 'Abbaas. Ia dipakai oleh kebanyakan Ushuliyyin. Imam asy-Syafi'e dan Shah Waliyyullah adalah antara tokoh yang menerima pakai ta'rif ini.

(v) Muhkam ialah sesuatu yang dapat difikir dengan 'aql. Mutasyabih pula ialah sesuatu yang tidak dapat difikir dengan 'aql, seperti bilangan raka'at sembahyang, kewajipan berpuasa di bulan Ramadhan bukan di bulan Sya'ban dan lain-lain. Ini ialah pendapat al-Mawardi.

(vi) Ayat-ayat yang berkaitan dengan kewajipan dan tanggungjawab adalah muhkam. Sementara ayat-ayat yang berkaitan dengan kisah-kisah, perbandingan dan perumpamaan pula adalah mutasyabih.

(vii) Muhkam ialah ayat-ayat yang berkaitan dengan amalan. Mutasyabih ialah yang hanya berkaitan dengan keimanan.

(viii) Ayat-ayat Naasikh adalah muhkam. Ayat-ayat mansukh pula adalah mutasyabih.

(ix) Muhkam ialah sesuatu perkataan atau ayat yang dapat difahami maksudnya sama ada menerusi dalil jali (terang) atau dalil khafi (tidak terang). Mutasyabih pula ialah sesuatu yang tidak ada langsung jalan untuk memahami dan mengetahuinya.

(x) Muhkam ialah sesuatu yang berdiri sendiri dan dapat difahami dengan sendirinya. Mutasyabih ialah sesuatu yang tidak berdiri sendiri. Untuk memahaminya anda memerlukan kepada sesuatu yang lain.

### **Perkara-Perkara Yang Termasuk Di Bawah Ta`rif (Definisi) Mutasyabihaat**

Seperti telah disebutkan sebelum ini, bahawa para `ulama' Tafsir terbahagi kepada tiga kumpulan dalam menentukan pembahagian ayat-ayat muhkamaat dan ayat-ayat mutasyabihaat di dalam al-Qur'an. Ada yang mengatakan semua sekali ayat al-Qur'an itu muhkam. Ada yang mengatakan semua sekali mutasyabih dan ada juga yang mengatakan sebahagian daripadanya muhkam dan sebahagian yang lain pula mutasyabih.

Pendapat pertama dan kedua tidak perlu dibawa ke meja perbincangan. Kerana keduanya hanya melihat dan menilai berdasarkan piawaian bahasa semata-mata.

Dalam perbincangan ini pendapat golongan ketiga sahaja yang diambil kira. Ayat-ayat bagaimanakah bagi mereka termasuk dalam muhkamaat dan ayat-ayat bagaimanakah pula yang termasuk dalam mutasyabihaat?

Para `ulama' sekali lagi berbeda pendapat dalam menanggapi persoalan ini. Menurut as-Suyuthi ayat-ayat mutasyabihaat ialah ayat-ayat yang mengandungi perkataan-perkataan atau ma`na-ma`na berikut:

(i) Sifat-sifat Allah. (ii) Istiwa' Allah (di atas `Arasy). (iii) Nafs. (iv) Wajah. (v) `Ain. (vi) Yad. (vii) Saaq. (viii) Sifat hampir. (ix) Sifat di atas. (x) Sifat datang. (xi) Sifat kasih. (xii) Sifat marah atau murka. (xiii) Sifat ridha. (xiv) Sifat hairan atau kagum. (xv) Sifat rahmat. (xvi) Sifat ma`iyyah (وهو معكم). (xvii) Sifat faraaghah (سفرغ لكم أيها الثقلان). Daripada (iii) hingga (xvii) ini semuanya mutasyabihaat apabila dikaitkan dengan Allah s.w.t. Dan (xviii) Huruf-huruf ringkas di permulaan sesetengah Surah al-Qur'an (الحروف المقطعة في أوائل بعض السور).

Apa yang disebut as-Suyuthi itu semuanya merupakan sifat-sifat Allah. Semuanya boleh dimasukkan dalam senarai ayat-ayat Sifat, kecuali yang ke (xviii) iaitu huruf-huruf ringkas di permulaan sesetengah Surah al-Qur'an. Itupun mengikut sesetengah 'ulama' Tafsir merupakan ringkasan kepada nama-nama sifat Allah s.w.t. juga.

Pengarang kitab at-Talwih (Sa'aduddin Mas'ud bin 'Umar at-Taftazani sy-Syafi'e m.793H) menambahkan tiga lagi sifat Allah yang tidak disebut oleh as-Suyuthi tadi. Qidam (sifat sedia), Sama' (sifat mendengar) dan Bashar (sifat melihat).

Pengarang Kasyful Asrar Syarah Usul al-Bazdawi ('Alauddin 'Abdul'Aziz bin Ahmad bin Muhammad al-Bukhari al-Hanafi m.730H) menulis bahawa hakikat melihat Allah di akhirat nanti, Yad (tangan), Wajah dan Istiwa' Allah di atas 'Arasy itu merupakan perkara-perkara yang disepakati 'ulama' tentang mutasyabihaatnya. Sebab itulah tiada nukilan daripada mereka sama sekali berhubung dengan penta'wilannya. Mereka bahkan melarang daripada menta'wilkannya. (Lihat Kasyful Asrar Syarah Usul al-Bazdawi j.1 m/s 58-59).

Apa yang ditulis oleh Pengarang Kasyful Asrar Syarah Usul al-Bazdawi itu sebenarnya tidaklah terhad pada tiga sifat tersebut sahaja. Malah ia merangkumi semua sifat-sifat Allah.

### **Pembahagian Mutasyabihaat Berdasarkan Kepelbagaian Sebab Tasyabuh**

Di dalam al-Fauzul Kabir Shah Waliyyullah hanya menyebutkan empat perkara sahaja daripada sekian banyak sebab Tasyabuh yang menyebabkan sesuatu ayat itu dianggap sebagai ayat mutasyabihah. Di bawah ini ini dikemukakan apa yang ditulis beliau di dalam kitab berkenaan:

(1) Disebabkan ada kemungkinan sesuatu dhamir (ganti nama) kembali kepada dua marji' (nama yang merupakan tempat dhamir dikembalikan) yang berbeza. Contohnya ialah seperti seseorang berkata: **أما إن الأمير أمرني أن ألعن فلانا لعنه الله** Bermaksud: Ketahuilah sesungguhnya pemerintah (/ketua/pemimpin/gabenor/menteri dan sebagainya) menyuruh saya mela'nat Si Fulan, semoga Allah mela'natnya).

(2) Sesuatu perkataan yang mempunyai (berkongsi) dua ma`na, seperti لَمَسْتُمْ . Ia boleh bererti bersetubuh dan boleh juga bererti menyentuh dengan tangan.

(3) Disebabkan ada kemungkinan `athaf kepada satu perkataan yang dekat dan yang jauh. Contohnya ialah: وامسحوا برؤوسكم وأرجلكم dengan mengambil kira qira'at yang membaca dengan kasrah أَرَجَلٍ.

(4) Disebabkan ada kemungkinan sesuatu haraf dipakai sebagai haraf `athaf dan haraf isti'naaf, seperti dalam firman Allah: وما يعلم تأويله إلا الله والراسخون في العلم يقولون آمنا به.

Menurut Raghīb al-Isfahānī (Abu al-Qasim al-Husain bin Muhammad m.502H) di dalam al-Mufradaat Fi Gharib al-Qur'an, ayat-ayat mutasyabihaat (yang tidak terang dan tidak jelas ma`nanya) terbahagi kepada tiga bahagian. (1) Mutasyabih dengan sebab lafaznya. (2) Mutasyabih dengan sebab ma`nanya. (3) Mutasyabih dengan sebab lafaz dan ma`na, kedua-duanya sekali.

Mutasyabih dengan sebab lafaz terbahagi pula kepada dua bahagian. (1) Mufrad. (2) Murakkab.

Mutasyabih (dengan sebab lafaz) Mufrad terbahagi pula kepada dua:

(a) Mutasyabih kerana keganjilannya (متشابه من جهة الغرابة), seperti perkataan هَلُوعًا, أَبٌ dan يَرْقُونَ. Perkataan أَبٌ tidak jelas ma`nanya. Kerana boleh jadi ia dipakai dengan ma`na rumput, padang rumput atau dengan ma`na-ma`na yang lain lagi. Sesetengah `ulama' berpendapat, أَبٌ kepada binatang sama seperti buah-buahan kepada manusia. Perkataan هَلُوعًا jarang diguna oleh orang-orang biasa. Ia adalah bahasa sastra yang tidak diketahui semua orang ma`nanya. Ma`na juga ada beberapa. Antaranya ialah terlalu takut dan tidak sabar, kedekut, lapar dan lain-lain. Demikian juga perkataan يَرْقُونَ. Ma`nanya tidak diketahui semua orang, selain tidak jelas dan tidak dapat dipastikan ma`nanya dengan tepat. Kerana ia boleh jadi bererti bergegas datang, bergegas pergi, berlari dan lain-lain.

(b) Mutasyabih kerana lafaznya dikongsi (متشابه من جهة المشاركة في اللفظ), seperti perkataan Yad dan `Ain. Yad dan `Ain mempunyai beberapa ma`na. Ma`na-ma`na itu berkongsi lafaz yang sama. Walaupun pada asalnya ia berma`na tangan, tetapi sering juga ia dipakai

dengan ma'na-ma'na yang lain, seperti kuasa, ni'mat, pertolongan, pemegang atau hulu sesuatu seperti pedang, kekuatan, keupayaan, milik dan lain-lain.

Mutasyabih murakkab (dengan sebab beberapa lafaz bergabung menjadi satu ayat) terbahagi kepada tiga bahagian:

(a) Mutasyabih kerana ringkas (متشابه للاختصار والإيجاز). Antara contohnya di dalam al-Qur'an ialah firman Allah ini:

وَأِنْ خِفْتُمْ أَلَّا تُقْسِطُوا فِي الْيَتَامَىٰ فَانكِحُوا مَا طَابَ لَكُمْ مِنَ النِّسَاءِ مَثْنَىٰ وَثُلَاثَ وَرُبْعَ فَإِنْ خِفْتُمْ أَلَّا تَعْدِلُوا فَوَاحِدَةً أَوْ مَا مَلَكَتْ أَيْمَانُكُمْ ذَلِكَ أَذَىٰ أَلَّا تَعْلَمُوا ﴿٥٠﴾

Bermaksud: Dan jika kamu takut tidak berlaku adil terhadap perempuan-perempuan yatim (apabila kamu berkahwin dengan mereka), maka berkahwinlah dengan sesiapa yang kamu berkenan dari perempuan-perempuan (lain): Dua, tiga atau empat. Kemudian jika kamu bimbang tidak akan berlaku adil (di antara isteri-isteri kamu) maka (berkahwinlah dengan) seorang sahaja atau (pakailah) hamba-hamba perempuan yang kamu miliki. Yang demikian itu adalah lebih dekat (untuk mencegah) supaya kamu tidak melakukan kezaliman. An-Nisaa':3).

Di antara Fi'il syarat dan jawab syarat ada sesuatu yang dibuang. Kerana agak panjang, maka ia dibuang untuk meringkaskan cerita. Tafsir bersama-sama dengan apa yang ditaqdirkan dalam firman Allah ini adalah seperti berikut:

أَيَّ وَإِنْ كَانَتْ تَحْتَ حَبْرٍ أَحَدِكُمْ يَتِيمَةً وَخَافَ أَلَّا يُعْطِيَهَا مَهْرَ مِثْلِهَا فَلْيَتْرَكْهَا إِلَىٰ مَا سِوَاهَا فَإِنَّ النِّسَاءَ كَثِيرٌ وَلَمْ يَضِيقِ اللَّهُ عَلَيْهِ فَاَنْكِحُوا ....

Maksudnya: Jika ada anak yatim dalam perlindunganmu, (walaupun kamu hendak mengahwininya) tetapi kamu takut tidak akan memberikan kepadanya mas kahwin yang selayak dengannya, maka jangan berkahwinlah dengannya. Sebaliknya carilah perempuan-perempuan lain. Kerana orang perempuan itu ramai mudah dicari. Maka berkahwinlah dengan ....

Boleh juga yang mahzuf (dibuang) itu ditaqdirkan dengan lebih ringkas, begini: أَيَّ فَلَا  
تَنْتَزِجُوهُنَّ وَانْكِحُوا Maksudnya: Dan jika kamu takut tidak berlaku adil terhadap perempuan-perempuan yatim (apabila kamu berkahwin dengan mereka), maka (jangan berkahwinlah



dengan mereka) dan (sebaliknya) berkahwinlah dengan sesiapa yang kamu berkenan dari perempuan-perempuan (lain), sampai dua, tiga atau empat.

(b) Mutasyabih kerana tafshil (متشابه للتفصيل والبسط). Antara contohnya di dalam al-Qur'an ialah firman Allah di bawah ini:

فَاطِرُ السَّمَوَاتِ وَالْأَرْضِ جَعَلَ لَكُم مِّنْ أَنْفُسِكُمْ أَزْوَاجًا وَمِنَ الْأَنْعَامِ أَزْوَاجًا يَذُرُّكُمْ فِيهِ لَيْسَ كَمِثْلِهِ شَيْءٌ وَهُوَ السَّمِيعُ الْبَصِيرُ ﴿١١﴾

Bermaksud: Dialah yang menciptakan langit dan bumi; Dia menjadikan bagi kamu pasangan-pasangan dari jenis kamu sendiri dan menjadikan dari jenis binatang-binatang ternak pasangan-pasangan (bagi bintang-binatang itu); dengan jalan yang demikian dikembangkanNya (zuriat keturunan) kamu semua. Tiada sesuatupun yang serupa denganNya. Dialah Yang Maha Mendengar, lagi Maha Melihat. (as-Syura:11).

Pada bahagian yang bergaris di bawahnya di dalam firman Allah di atas itulah ada apa yang dinamakan 'Mutasyabih kerana tafshil' (متشابه للتفصيل والبسط). Kerana huruf ك yang bercantum di permulaan perkataan مثله itu adalah huruf tambahan (زائدة). Jika tidak dikatakan ia huruf tambahan, niscaya tidak akan benar ma'nanya. Kalau dikatakan ليس مثله tanpa huruf ك itu, niscaya lebih mudah difaham oleh manusia biasa.

(c) Mutasyabih kerana susunan ayat (متشابه لنظم الكلام). Antara contohnya di dalam al-Qur'an ialah firman Allah di bawah ini:

أَلْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَلَمْ يَجْعَلْ لَهُ عِوَجًا ﴿١﴾ فَيَمَّا لَيُنْذِرُ بَأْسًا شَدِيدًا مِّنْ لَّدُنْهُ وَيُبَشِّرُ الْمُؤْمِنِينَ الَّذِينَ يَعْمَلُونَ الصَّالِحَاتِ أَنَّ لَهُمْ أَجْرًا حَسَنًا ﴿٢﴾

Bermaksud: Segala puji bagi Allah yang telah menurunkan kepada hambaNya Al-Kitab (Al-Quran) dan Dia tidak mengadakan sebarang kebengkokan di dalamnya (1) sebagai bimbingan yang lurus dan betul, untuk memperingatkan siksaan yang sangat pedih dari sisiNya dan memberi berita gembira kepada orang-orang yang beriman, yang mengerjakan amal saleh, bahawa mereka akan beroleh balasan yang baik. (2) (al-Kahf:1-2).

Bahagian yang bergaris di dalam firman Allah di atas adalah yang berkenaan. Menurut keterangan Ibnu 'Abbaas, Mujahid dan az-Zamakhshari tertib asal ayat itu ialah: **الكتاب قَيِّمًا**. Kerana **قَيِّمًا** menjadi hal kepada **الكتاب**. Ia sepatutnya terletak terus selepas **الكتاب**. Tetapi di sini ia dipisahkan dengan satu jumlah (ayat) lain yang sepatutnya terletak selepasnya. Antara rahsia kenapa Allah mengatur ayat itu demikian pada pandangan al-'Allamah Mahmud al-Aalusi ialah oleh kerana lafaz **قَيِّمًا** merupakan sifat musyabbahah dan sighah mubalaghah, tidak mengapa kalau ia dipisahkan daripada Sahibul Halnya. Oleh kerana tidak ada pula benda (khususnya kitab) di dunia ini yang langsung tidak ada kurang dan cacatnya, maka segera diletakkan **وَلَمْ يَجْعَلْ لَهُ عِوَجًا** terus selepas **الكتاب**. Tujuannya ialah untuk menafikan kekurangan atau kecacatan di dalam **الكتاب** yang diturunkan itu. Kerana pada kebiasaannya menurut hukum adat, tidak ada benda yang langsung tidak kurang. Sedikit sebanyak tentu ada kurang dan cacatnya. Ia ditaqdimkan (didahulukan) untuk ihtiraas (menjaga supaya tidak disalah faham) dan ihtimaam (menggambil berat tentang sesuatu yang patut diambil berat).

Mutasyabih dari sudut ma'na terdapat di dalam ayat-ayat yang mengandungi cerita tentang sifat-sifat Allah dan juga hal ehwal alam akhirat.

Mutasyabih dengan sebab lafaz dan ma'na pula terbahagi kepada lima bahagian.

(a) Kerana bilangan, jumlah atau kuantiti dan umum serta khusus sesuatu perkara tidak jelas (**متشابه من جهة الكمية**). Antara contohnya di dalam al-Qur'an ialah firman Allah di bawah ini:

فَإِذَا أَدْلَخَ الْأَشْهُرَ الْحُرُمَ فَاقْتُلُوا الْمُشْرِكِينَ حَيْثُ وَجَدْتُمُوهُمْ وَخُذُوهُمْ وَأَخْصِرُوهُمْ وَأَقْعُدُوا لَهُمْ كُلٌّ مَرْصِدٌ إِن تَابُوا وَأَقَامُوا

الصَّلَاةَ وَآتَوْا الزَّكَاةَ فَخَلُّوا سَبِيلَهُمْ إِنَّ اللَّهَ غَفُورٌ رَحِيمٌ ﴿٥﴾

Bermaksud: Apabila sudah habis bulan-bulan Haram itu, maka bunuhlah orang-orang musyrik itu di mana sahaja kamu menemuinya dan tawanlah mereka, dan juga kepongklah mereka, serta tunggulah mereka di tiap-tiap tempat mengintipnya. Jika mereka bertaubat (dari kekufurannya) dan mendirikan sembahyang serta memberi zakat, maka biarkanlah mereka (jangan diganggu). Sesungguhnya Allah Maha Pengampun, lagi Maha Mengasihani. (at-Taubah:5).

Orang-orang musyrik yang diperintah Allah supaya dibunuh dan lain-lain di dalam ayat di atas masih tidak jelas, apakah semua mereka atau sebahagian saja?

(b) Kerana keadaan dan kaifiat yang tidak jelas (متشابه من جهة الكيفية). Sama ada ia wajib, sunat dan sebagainya. Antara contohnya ialah firman Allah ini:

وَإِنْ خِفْتُمْ أَلَّا تُقْسِطُوا فِي الْيَتَامَىٰ فَانكِحُوا مَا طَابَ لَكُمْ مِنَ النِّسَاءِ مِمَّا مَلَكَتْ أَيْمَانُكُمْ ذَلِكَ أَدْنَىٰ أَلَّا تَعُولُوا ۝

Bermaksud: Dan jika kamu takut tidak berlaku adil terhadap perempuan-perempuan yatim (apabila kamu berkahwin dengan mereka), maka berkahwinlah dengan sesiapa yang kamu berkenan dari perempuan-perempuan (lain): Dua, tiga atau empat. Kemudian jika kamu bimbang tidak akan berlaku adil (di antara isteri-isteri kamu) maka (berkahwinlah dengan) seorang sahaja atau (pakailah) hamba-hamba perempuan yang kamu miliki. Yang demikian itu adalah lebih dekat (untuk mencegah) supaya kamu tidak melakukan kezaliman. An-Nisaa':3).

Perintah Allah supaya berkahwin dengan sesiapa yang kamu berkenan dari perempuan-perempuan (lain); sampai dua, tiga atau empat itu masih tidak jelas hukumnya, sama ada ia wajib, sunat atau harus saja. Untuk memastikannya anda perlu meruju' kepada dalil yang lain pula.

(c) Kerana tempat dan sebab turunnya tidak jelas (متشابه من جهة المكان والأمر التي نزلت فيها). Antara contohnya dari al-Qur'an ialah:

يَسْأَلُونَكَ عَنِ الْأَهْلِ قُلْ هِيَ مَوَاقِيْتُ لِلنَّاسِ وَالْحَجِّ وَلَيْسَ الْبِرُّ بِأَنْ تَأْتُوا الْبُيُوتَ مِنْ ظُهُورِهَا وَلَكِنَّ الْبِرَّ مَنِ اتَّقَىٰ وَأَتُوا الْبُيُوتَ مِنْ أَبْوَابِهَا وَاتَّقُوا اللَّهَ لَعَلَّكُمْ تُفْلِحُونَ ۝

Bermaksud: Mereka bertanya kepadamu tentang bulan sabit. Katakanlah: "Bulan sabit itu adalah tanda-tanda waktu bagi manusia dan (bagi ibadat) haji; Dan bukanlah kebajikan itu memasuki rumah-rumah dari belakangnya, akan tetapi kebajikan itu ialah kebajikan orang yang bertaqwa. Dan masuklah ke rumah-rumah itu dari pintu-pintunya; dan bertaqwalah kepada Allah agar kamu beruntung (al-Baqarah:189).

Lihat bahagian yang bergaris. Orang yang tidak mengetahui latar belakang adat dan ritual orang-orang kafir di zaman Nabi s.a.w. dan tidak mengetahui pula sebab nuzul ayat di atas tidak akan faham maksudnya dengan semata-mata memerhati dan membacanya.

(d) Kerana syarat sah atau tidaknya sesuatu perbuatan (seperti sembahyang, zakat, nikah dan sebagainya) tidak jelas (متشابه من جهة الشروط التي بها يصح الفعل أو يفسد). Antara contohnya di dalam al-Qur'an ialah firman Allah ini:

وَأَقِيمُوا الصَّلَاةَ وَآتُوا الزَّكَاةَ وَارْكَعُوا مَعَ الرَّاكِعِينَ ﴿٤٣﴾

Bermaksud: Dan dirikanlah shalat, tunaikanlah zakat dan ruku'lah kamu bersama-sama orang-orang yang ruku'. (al-Baqarah:43).

Apakah perintah mendirikan shalat dan menunaikan zakat itu perlu dilaksanakan tanpa sebarang syarat? Tentu tidak. Apakah shalat dan zakat itu dikira sah walaupun syarat-syaratnya tidak dipenuhi? Tentu tidak. Tidak adakah pula perkara-perkara yang boleh merosakkannya? Tentu ada. Tetapi di dalam ayat yang sama tidak ada keterangan tentangnya. Maka jadilah ia mutasyabih. Walaupun keterangan tentangnya boleh ditemui dalam ayat-ayat atau dalil-dalil yang lain.

(e) Kerana masa turunnya ayat tidak jelas (متشابه من جهة الزمان). Sedangkan penentuan Nasikh dan Mansukh sesuatu ayat misalnya terhenti atas pengetahuan mengenainya. Antara contohnya di dalam al-Qur'an ialah firman Allah di bawah ini:

يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنتُمْ مُسْلِمُونَ ﴿١٠٢﴾

Bermaksud: Wahai orang-orang yang beriman! Bertaqwalah kamu kepada Allah dengan sebenar-benar taqwa; dan janganlah sekali-kali kamu mati melainkan dalam keadaan beragama Islam. (Aali 'Imraan:102).

Melalui ayat ini Allah memerintahkan orang-orang yang beriman supaya bertaqwalah kepada Allah dengan sebenar-benar taqwa. Melalui ayat 16 dari Surah at-Taghaabun yang akan datang pula Allah memerintahkan supaya orang-orang yang beriman bertaqwa kamu kepada Allah menurut kesanggupan mereka sahaja. Di sini sudah ada pertentangan di antara dua ayat berkenaan. Untuk menghilangkan pertentangan itu sesetengah 'ulama'

berpendapat ayat 102 dari Surah Aali `Imraan dimansuhkan oleh firman Allah di bawah ini:

فَاتَّقُوا اللَّهَ مَا اسْتَطَعْتُمْ وَأَطِيعُوا وَأَنْفِقُوا خَيْرًا لِّأَنْفُسِكُمْ وَمَنْ يُوقْ شَحْ نَفْسِهِ فَأُولَئِكَ هُمُ الْمُفْلِحُونَ ﴿١٥﴾

Bermaksud: Oleh itu bertaqwalah kamu kepada Allah menurut kesanggupanmu dan dengarlah serta ta`atlah dan nafkahkanlah nafkah yang baik untuk dirimu. Dan sesiapa yang dipelihara dari tabiat bakhilnya, maka mereka itulah orang-orang yang berjaya. (at-Taghaabun:16).

Tetapi pendapat ini tidak kuat, kerana tidak dapat dipastikan mana satu daripada dua ayat di atas diturunkan dahulu dan mana yang diturunkan kemudian. Kerananya ia menjadi mutasyabih. Adalah lebih baik dipakai kedua-dua ayat tersebut berlandaskan qaedah jama`, dengan mengatakan ayat 102 dari Surah Aali `Imraan itu berkaitan dengan `aqidah atau amalan-amalan agama yang wajib. Sementara ayat 16 dari Surah at-Taghaabun pula berkaitan dengan amalan-amalan sunat dalam agama yang dilakukan dengan anggota badan.

Daripada keterangan yang lalu dapat disimpulkan bahawa apa yang dibincangkan oleh para Mufassirin berhubung dengan perkara-perkara yang termasuk dalam mutasyabihaat itu tidak terkeluar daripada pembahagian yang telah dibentangkan sebelum ini. Ia secara ringkasnya ada tiga macam.

- (1) Mutasyabihaat yang langsung tidak ada jalan untuk mengetahuinya, seperti hakikat sifat-sifat Allah dan perkara-perkara ghaib yang lain.
- (2) Mutasyabihaat yang dapat diketahui melalui kajian dan penguasaan qaedah-qaedah tertentu, seperti qaedah bahasa `Arab, qaedah Usul Fiqh dan sebagainya.
- (3) Mutasyabihaat yang dapat diketahui dan dicapai oleh sesetengah orang yang mantap ilmu agamanya sahaja. Ia berada di antara mutasyabihaat dari bahagian (1) dan mutasyabihaat dari bahagian (2) tadi. Dengan kemantapan ilmunya ia dapat menentukan ma`na lafaz-lafaz musytarak misalnya berpandukan tanda-tanda dan petunjuk-petunjuk tertentu.

### **Perkara-Perkara Yang Termasuk Di Bawah Ta'rif (Definisi) Mutasyabihaat menurut Shah Waliyyullah**

Daripada tulisan-tulisan Shah Waliyyullah dapat disimpulkan bahawa pada pandangan beliau perkara-perkara yang termasuk dalam mutasyabihaat ialah:

(i) Yad (tangan). (ii) Rijl (kaki). (iii) Dhahik (ketawa). (iv) Sifat 'Uluw (tinggi). (v) Sifat besar atau agung. (vi) Sifat Rahmat. (vii) Sifat Marah atau Murka. (viii) Sifat Murah. (ix) Istiwa'. (x) Zat. (xi) Sama'. (xii) Bashar. (xiii) Kalam. (xiv) Qudrat. Daripada nombor (i) hingga nombor (xiv) ini, semuanya dikira mutasyabihaat apabila dikaitkan dengan Allah s.w.t. (xv) Timbangan amalan. (xvi) Melintasi Shirat. (xvii) Duduknya mayat di dalam kubur. (xviii) Soalan malaikat dalam kubur. (xix) Kubur menjadi luas atau sempit. (xx) Mayat bertempik. (xxi) Mahsyar. (xxii) Riwayat-riwayat yang berbeza-beza tentang keadaan kebangkitan sesudah mati. (xxiii) Segala perbandingan dan perumpamaan (khususnya yang berkaitan dengan Allah dan perkara-perkara ghaib). (xxiv) Semua sifat Allah selain yang tersebut sebelum ini. (xxv) Semua perkara yang berkaitan dengan hari kemudian selain yang tersebut tadi.

Apa yang disebutkan oleh Shah Waliyyullah itu boleh diserapkan ke dalam dua perkara utama sahaja sebenarnya, iaitu: (i) Sifat-sifat Allah yang boleh mengelirukan keserupaanNya dengan makhlukNya. (ii) Perkara-perkara yang berkaitan dengan kehidupan sesudah mati.

Secara kasarnya bolehlah dikatakan dua perkara itu sahajalah yang termasuk dalam mutasyabihaat sebenar-benarnya menurut pandangan Shah Waliyyullah. Adapun selain itu, maka semuanya masih termasuk dalam perkara-perkara yang diperselisihkan, sama ada ia termasuk dalam mutasyabihaat atau tidak.

Melihat kepada kepelbagaian ta'rif yang dikemukakan sebelum ini, masih banyak lagi perkara yang boleh termasuk dalam mutasyabihaat.

Daripada perbincangan Shah Waliyyullah di dalam beberapa buah kitabnya dapat disimpulkan bahawa perkara-perkara yang termasuk dalam senarai mutasyabihaat itu adalah sebagai berikut:

(a) Sifat-sifat Allah yang boleh mengelirukan keserupaanNya dengan makhlukNya. (b) Perkara-perkara yang berkaitan dengan kehidupan sesudah mati. (c) Lafaz Musytarak. (d) 'Aam. (e) Majaaz. (f) Kinayah. (g) Ta'ridh. (h) Tempat di mana dhamir (kata ganti nama) berkemungkinan kembali kepada dua marji' (tempat kembali) yang berbeza. (i) Tempat di mana ada kemungkinan sesuatu lafaz di'athafkan kepada sesuatu yang dekat dan yang jauh daripadanya, kedua-dua sekali. (j) Tempat di mana ada kemungkinan sesuatu lafaz dipakai sebagai 'athaf dan juga sebagai isti'naaf. (k) Semua perkara yang dikenali dalam istilah 'ulama'-'ulama' Hanafi sebagai (i) Khafi. (ii) Musykil dan (iii) Mujmal.

Perlu sekali diingat bahawa ta'wilan-ta'wilan tentang sifat-sifat Allah yang dibuat oleh kebanyakan golongan Khalaf itu bukan kerana mereka tidak menganggapnya sebagai perkara-perkara yang termasuk dalam mutasyabihaat, tetapi kerana mereka menganggap masih ada ruang keharusan membincangkan tentangnya. Sama ada Salaf atau Khalaf semuanya menerima bahawa ayat-ayat sifat itu memang merupakan ayat-ayat mutasyabihaat, yang berbeza cuma Salaf langsung tidak menta'wilkannya. Sementara Khalaf pula menta'wilkannya secara dzanni (على سبيل الاحتمال), bukan secara pasti dan qath'i (لا على سبيل العلم والجزم واليقين).

### **Alasan Dan Punca Orang-Orang Yang Melarang Dan Membenarkan Perbincangan Tentang Ayat-Ayat Mutasyabihaat**

Alasan dan punca perbedaan pendapat 'ulama' berhubung dengan boleh atau tidak bolehnya berbincang tentang ayat-ayat mutasyabihaat dan adakah manusia tertentu dapat mengetahuinya selain Allah ialah firman Allah s.w.t. juga. Ia terdapat di dalam Surah Aali 'Imraan ayat 7. Di bawah ini dikemukakan ayat berkenaan:

هُوَ الَّذِي أَنْزَلَ عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ مُتَشَابِهَاتٌ فَأَمَّا الَّذِينَ فِي قُلُوبِهِمْ زَيْغٌ فَيَتَّبِعُونَ مَا تَشَابَهَ مِنْهُ ابْتِغَاءَ الْفِتْنَةِ وَابْتِغَاءَ تَأْوِيلِهِ وَمَا يَعْلَمُ تَأْوِيلَهُ إِلَّا اللَّهُ وَالرَّاسِخُونَ فِي الْعِلْمِ يَقُولُونَ ءَامَنَّا بِهِ كُلٌّ مِنْ عِنْدِ رَبِّنَا وَمَا يَذَّكَّرُ إِلَّا أُولُو الْأَلْبَابِ ﴿٧﴾

Bermaksud: Dialah yang menurunkan kepadamu (wahai Muhammad) al-Kitab (al-Quran) kepada kamu. Di antara (isi)nya ada ayat-ayat yang muhkamaat, itulah pokok-pokok isi al-Qur'an dan yang lain (ayat-ayat) mutasyabihaat. Adapun orang-orang yang dalam

hatinya ada kecondongan kepada kesesatan, maka mereka mengikuti sebahagian ayat-ayat yang mutasyabihaat daripadanya untuk menimbulkan fitnah dan untuk mencari-cari ta'wilnya, padahal tidak ada yang mengetahui ta'wilnya melainkan Allah. Dan orang-orang yang mendalam ilmunya berkata: "Kami beriman kepada ayat-ayat yang mutasyabihaat, semuanya itu dari sisi Tuhan kami". Dan tidak dapat mengambil pelajaran (daripadanya) melainkan orang-orang yang berakal. (Aali `Imraan:7).

Para `ulama' dalam memahami ayat ini, khususnya bahagian yang bergaris di bawahnya itu terbahagi kepada dua kumpulan besar.

- (1) Kumpulan pertama berpendapat, tidak ada orang yang mengetahui tentang ma'na (sebenar) ayat-ayat mutasyabihaat kecuali Allah.
- (2) Kumpulan kedua pula berpendapat, selain Allah ada juga orang-orang tertentu yang (dapat) mengetahui ma'na ayat-ayat mutasyabihaat itu, meskipun tidak secara tafshili (terperinci) dan tidak juga secara qath'i (pasti).

Secara asasnya kumpulan pertama berpendapat firman Allah:

وما يعلم تأويله إلا الله والراسخون في العلم يقولون ءأمننا به

Waqafnya (berhenti dalam bacaan) adalah pada perkataan Allah. Perkataan selepasnya dimulakan dengan و isti'naaf dan ia menjadi muftada'. Perkataan يقولون pula adalah khabarnya.

Maka kesimpulannya ialah hanya Allah jua yang mengetahui ma'na ayat-ayat mutasyabihaat dan ta'wilnya itu. Orang-orang yang mendalam ilmunya berkata, meskipun dalam keadaan tidak mengetahui ma'na-ma'na dan ta'wilnya: "Kami beriman kepada ayat-ayat yang mutasyabihaat, semuanya itu dari sisi Tuhan kami". Mereka juga menerima kebenarannya dan percaya kepadanya secara ijmal. Tafsiran dan ta'wilannya bagi mereka merupakan antara rahsia-rahsia Allah. Saiyyidina Abu Bakar, `Ali, `Aaishah, Ubaiy bin Ka`ab, Ibnu Mas`ud, kebanyakan sahabat dan juga kebanyakan Tabi'in adalah antara orang-orang yang termasuk dalam kumpulan pertama ini. Itulah pendapat Ibnu `Abbaas berdasarkan riwayat yang paling sahih daripada beliau. Inilah juga pegangan Salaf dari kalangan Ahli as-Sunnah Wa al-Jama`ah.



Antara alasan kumpulan pertama lagi ialah:

(a) Ibnu Jarir menukilkkan qira'at (tafsiriyyah) Ibnu Mas'ud begini:

إِنْ تَأْوِيلُهُ إِلَّا عِنْدَ اللَّهِ، وَالرَّاسِخُونَ فِي الْعِلْمِ يَقُولُونَ آمَنَّا بِهِ

Bermaksud: Ta'wilannya hanya ada pada Allah. Orang-orang yang mendalam ilmunya berkata, kami beriman dengannya.

(b) Sebagaimana Allah mencela orang-orang yang mengikuti ayat-ayat mutasyaabihaat dengan maksud menimbulkan fitnah, begitulah Allah mencela orang-orang yang mengikuti ayat-ayat mutasyaabihaat dengan maksud mencari-cari ta'wilnya. Itulah yang dimaksudkan oleh ayat 7 Surah Aali 'Imraan.

(c) 'Aaishah meriwayatkan setelah Rasulullah s.a.w. membaca ayat 7 Surah Aali 'Imraan, baginda bersabda: فَإِذَا رَأَيْتَ الَّذِينَ يَتَّبِعُونَ مَا تَشَابَهَ مِنْهُ فَأُولَئِكَ الَّذِينَ سَمَى اللَّهُ فَاخَذُواهُمْ Bermaksud: "Apabila kamu melihat orang-orang yang mengikuti ayat-ayat mutasyaabihaat, maka itulah orang-orang yang dimaksudkan oleh Allah. Berwaspadalah kamu dengan mereka." (Riwayat Bukhari, Muslim dan lain-lain).

(d) Adakalanya Allah menyebutkan sesuatu yang tidak dapat dijangkau oleh fikiran manusia di dalam al-Qur'an semata-mata untuk menguji keimanan mereka. Orang-orang yang beriman dan mendalam ilmunya akan menerimanya dengan senang hati dan menyerahkan saja hakikatnya kepada Allah. Itulah yang dimaksudkan oleh Allah melalui ayat 7 Surah Aali 'Imraan.

Kumpulan kedua berpendapat, waqafnya adalah pada perkataan العلم dan و sebelum perkataan الراسخون adalah و athaf. Ma'thuf 'alaihnya ialah perkataan الله yang tersebut sebelumnya. Perkataan يقولون pula menurut mereka menjadi Haal.

Hasil daripadanya ialah selain Allah, orang-orang yang mendalam ilmunya juga mengetahui ta'wilan dan ma'na ayat-ayat mutasyabihaat itu. Antara tokoh yang termasuk dalam kumpulan kedua ini ialah Mujahid, Rabi' bin Anas, al-Qasim bin Muhammad, Ibnu Juraij dan lain-lain. Ibnu 'Abbaas adalah antara sahabat yang dinukilkan

berpendapat demikian. Golongan Mutakallimin khususnya dari kalangan Khalaf dan majoriti Mu'tazilah juga termasuk dalam kumpulan ini.

Antara alasan kumpulan kedua lagi ialah:

(a) Ahli-ahli Tafsir di sepanjang zaman menta'wil dan mentafsirkan semua ayat-ayat al-Qur'an. Tidak pernah pula ada antara mereka tidak mahu mentafsirkan mana-mana ayat al-Qur'an atas alasan ia adalah ayat mutasyabihaat yang hanya diketahui Allah ma'na dan ta'wilannya. Dengan sebab itu tiada siapa pun boleh membincangkannya. Ibnu 'Abbaas malah dinukilkan berkata: *الراسخون في العلم يعلمون تأويل المتشابه وأنا ممن يعلم تأويله* Bermaksud: "Orang-orang yang mendalam ilmu mengetahui ta'wilan mutasyabih. Aku adalah antara orang yang mengetahui ta'wilannya." Selain itu perbincangan dan tafsiran tentang huruf muqattha'at adalah suatu yang masyhur di kalangan ahli Tafsir dan ia dinukilkan juga daripada beberapa orang sahabat.

(b) Mujahid dan Ibnu Juraij dinukilkan berkata: *والراسخون في العلم يعلمون تأويله ويقولون آمنا به* Bermaksud: "Orang-orang yang mendalam ilmunya mengetahui ta'wilannya dan mereka berkata, kami beriman dengannya."

(c) Kalau tidak ada siapa pun mengetahui ta'wilan dan ma'na ayat-ayat yang dikatakan mutasyabihaat itu, maka apa gunanya Allah memasukkannya ke dalam al-Qur'an? Bukankah itu bererti Allah berbicara kepada manusia dengan sesuatu yang langsung tidak dimengertinya??

(d) Kalau tidak ada siapa pun mengetahui ta'wilan dan ma'na ayat-ayat mutasyabihaat, maka tidak ada beza lagi antara orang alim dan orang jahil dan tidak ada lagi tingkatan-tingkatan ilmu yang membezakan seorang alim daripada seorang alim yang lain? Dan ini adalah suatu yang bercanggah dengan kenyataan.

Inilah sebenarnya asas bagi perbezaan pendapat dua kumpulan 'ulama' di atas.